



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-I/25-2-40-234-4/21**

Datum: **21.06.2021. god.**

«Agencija za vodno područje rijeke Save» Sarajevo rješavajući po zahtjevu Javnog preduzeća Regionalni vodovoda «Plava Voda» d.o.o. Travnik, za izdavanje vodne saglasnosti za zahvat vode na izvoristu „Plava Voda” i izgradnju cjevovoda iznad ili u vodotoku, a sve u cilju obezbjeđenja dugoročnog snabdijevanja vodom, putem regionalnog sistema vodosnabdijevanja, dijelova pet općina: Travnik, Novi Travnik, Vitez, Busovača i Zenica, na osnovu člana 114., a u vezi sa članom 109. stav (1) tačka 1. i 10. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), **d o n o s i**

RJEŠENJE **o vodnoj saglasnosti**

1. Podnosiocu zahtjeva, JP Regionalni vodovod «Plava Voda» d.o.o. Travnik, daje se vodna saglasnost na Glavni projekat: „Regionalni sistem vodosnabdijevanja Plava voda”, *urađen od strane Instituta za hidrotehniku Građevinskog fakulteta u Sarajevu, oktobar 2010 – oktobar 2011. godine.*
2. Vodna saglasnost se donosi na osnovu utvrđenog činjeničnog stanja, pregleda investiciono – tehničke dokumentacije iz tačke 1. dispozitiva ovog Rješenja, koja se ovjerena vraća podnosiocu zahtjeva na trajno čuvanje i čini sastavni dio ovog Rješenja, a ista će se koristiti u postupku pribavljanja odobrenja za građenje.
3. Vodna saglasnost se odnosi na zahvat vode na izvoristu „Plava Voda” i izgradnju objekata iznad ili u vodotoku I kategorije na dijelu trase regionalnog vodovodnog sistema «Plava Voda» i ne oslobađa podnosioca zahtjeva obaveze pribavljanja vodne saglasnosti za aktivnosti definisane članom 17. stav (2) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», broj 31/15, 55/19 i 41/20) (izgradnju objekata iznad ili u vodotoku II. kategorije, uređenje vodotoka na površinskim vodama II. kategorije, izgradnju pristupnih saobraćajnica i sl.), a za čije izdavanje je nadležno Ministarstvo poljoprivrede, vodoprivrede i šumarstva Srednjobosanskog, odnosno Zeničko-Dobojskog kantona.
4. Vodna saglasnost se daje na temelju dostavljene projektne dokumentacije pod sljedećim uslovima:
 - 4.1. Investitor je dužan izgradnju Regionalnog sistema vodosnabdijevanja „Plava voda” izvršiti u skladu sa revidovanom i ovjerenom projektnom dokumentacijom iz tačke 1. dispozitiva ovog rješenja. Izvođenje radova vršiti u skladu i na način utvrđen u opisu tehničkog rješenja i tehničkih uslova izvođenja iz navedene projektne dokumentacije.
 - 4.2. Investitor i Izvođač radova su obavezni pridržavati se svih uslova i mjera propisanih u ovoj vodnoj saglasnosti i obnovljenoj Okolišnoj dozvoli, broj: UPI/05/2-23-11-76/16 SN od 26.08.2016. godine, izdatoj od strane Federalnog ministarstva okoliša i turizma, a u cilju sprečavanja i smanjenja štetnih uticaja i vršenja monitoringa kako u toku pripreme gradnje tako i u toku gradnje i eksploatacije Regionalnog sistema vodosnabdijevanja Plava voda.
 - 4.3. Investitor je dužan da poduzme sve potrebne mjere da u toku izgradnje i eksploatacije Regionalnog sistema vodosnabdijevanja Plava voda ne dođe do šteta ili nepovoljnih uticaja na vode i vodni režim (ugrožavanje ekološki prihvatljivog protoka, degradiranja kvaliteta voda, promjene morfologije vodotoka, povećanje rizika od poplava ili erozije dna i obala vodotoka itd).
 - 4.4. Investitor je dužan da poduzme sve potrebne mjere da u toku izgradnje Regionalnog sistema vodosnabdijevanja „Plava voda” ne dođe do prekida vodosnabdijevanja stanovništva i privrede pitkom vodom iz postojećeg vodozahvata „Plava voda”. Ukoliko se u toku redovnih ili vanrednih analiza i kontrola kvaliteta zahvaćene vode iz postojećeg vodozahvata „Plava voda”, utvrdi da je, usljed izgradnje, došlo do pogoršanja kvaliteta zahvaćenih vode te da ista ne zadovoljava uslove vode za piće (propisane Pravilnikom), investitor je obavezan na adekvatan način omogućiti uredno snabdijevanje pitkom vodom.

U tom slučaju operator vodovodnog sistema treba postojeći vodozahvat isključiti iz upotrebe te blagovremeno i na adekvatan način obavijestiti krajnje potrošače da voda iz istog nije za piće, a da će snabdijevanje pitkom vodom biti obezbjeđeno u najkraćem roku i na adekvatan način.

- 4.5. U toku izgradnje i eksploatacije vodozahvatne građevine posebno voditi računa o ispuštanju utvrđenog biološkog minimuma (ekološki prihvatljiv protok), posebno u ljetnim sušnim periodima, na dionici vodotoka nizvodno od vodozahvata „Plava voda“.
- 4.6. Neposredno nizvodno od zahvatne građevine uspostaviti kontrolno-mjerni profil na kojem će se vršiti kontrola ispuštanja utvrđenog ekološki prihvatljivog protoka (biološkog minimuma Plave vode).
- 4.7. Da se za područje na kojem se nalazi izvoriste „Plava voda“, a na osnovu provedenih istražnih radova i urađenog i revidovanog Projekta zaštite izvorišta, donese Odluka o provođenju zaštite izvorišta „Plava voda“, a sve u skladu sa članom 66. i 68. Zakona o vodama.
- 4.8. Prije početka radova, Investitor je obavezan, na adekvatan način, obavijestiti korisnike voda o početku gradnje (ribare, stanovništvo / korisnike voda i dr), a u cilju poduzimanja eventualno potrebnih zaštitnih mjera.
- 4.9. Prije izbora izvođača radova, a u cilju utvrđivanja stanja na trasi i otklanjanja eventualnih tehničkih i administrativnih smetnji u realizaciji projekta, a zbog relativno velikog vremenskog perioda od izrade projektne dokumentacije i mogućih promjena na terenu, Investitor je dužan izvršiti uviđaj na terenu konstatovati promjene i otkloniti prepreke, ukoliko se konstatira da su iste nastale i mogle usporiti ili ugroziti realizaciju projekta.
- 4.10. Investitor (korisnik vodne saglasnosti) je u obavezi da angažuje stručno lice sa osnovnim zadatkom kontinuiranog nadzora (praćenja i kontrole) nad provođenjem projektovanih aktivnosti na terenu.
- 4.11. Prilikom izvođenja radova treba koristiti opremu i mašine koje su tehnički ispravne, bez curenja tečnih goriva, maziva, hidrauličkih ulja i sl.
- 4.12. U toku izgradnje, višak materijala iz iskopa mora se odvesti van područja vodnog dobra i javnog vodnog dobra. Deponije materijala rješavati na način da ne remete prirodni režim voda.
- 4.13. Sve kolizije sa postojećim infrastrukturnim objektima (instalacijama vodovoda i kanalizacije, elektro i sl.), na lokalitetu na kojem će se vršiti radovi, ukoliko do takvih situacija tokom izvođenja radova dođe, prethodno će se rješavati uz saglasnost mjesno nadležnog operatera koji upravlja tim objektima i instalacijama i isti će dati tehničke uslove za izvođenje ovih radova.
- 4.14. Investitor je obavezan da, po završenoj izgradnji Regionalnog sistema vodosnabdijevanja Plava voda, osigura izradu projekta izvedenog stanja te isti dostavi uz zahtjev za izdavanje vodne dozvole.
5. Ukoliko izgradnjom Regionalnog sistema vodosnabdijevanja Plava voda dođe do promjene režima voda, a te promjene prouzrokuju štete trećim osobama, investitor je obavezan otkloniti uzroke štete, a pričinjenu štetu nadoknaditi.
6. Nakon izgradnje Regionalnog sistema vodosnabdijevanja Plava voda, a prije pribavljanja upotrebne dozvole, Investitor je dužan osigurati tehnički prijem izgrađenih objekata, pribaviti Odluku o zaštiti izvorišta „Plava voda“, te zatražiti vodnu dozvolu od nadležnog organa, a sve u skladu sa Zakonom o vodama i Pravilnikom o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19 i 41/20).
7. Korisnik vodne saglasnosti je dužan da prije početka izvođenja radova riješi imovinsko pravne odnose na lokalitetu izvođenja radova, na mjestu formiranja privremenih gradilišta, pristupnim putevima i slično.
8. Vodna saglasnost prestaje da važi istekom roka od dvije godine od dana njene pravosnažnosti ukoliko do tog dana nije pribavljeno odobrenje za građenje i započeti radovi.
9. Ovo rješenje o vodnoj saglasnosti može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Javno preduzeće Regionalni vodovod «Plava Voda» d.o.o. Travnik, svojim zahtjevom zaprimljenim 27.05.2021. godine, zatražilo je izdavanje vodne saglasnosti za aktivnost zahvatanja vode na izvorištu „Plava Voda“ i izgradnju cjevovoda iznad ili u vodotoku, a sve u cilju obezbjeđenja pouzdanog dugoročnog snabdijevanja vodom, putem regionalnog sistema vodosnabdijevanja, dijelova pet općina: Travnik, Novi Travnik, Vitez, Busovača i Zenica.

Uz zahtjev za izdavanje vodne saglasnosti dostavljena je slijedeća dokumentacija:

A. Opšta dokumentacija:

- Ovjerena kopija aktuelnog izvoda iz sudskog registra broj: 051-0-RegZ-20-000664 od 16.06.2020. godine, Općinski sud u Travniku,
- Ovjerena kopija Uvjerenja o poreznoj registraciji, od 17.10.2016. godine, izdata od strane Porezne uprave-Kantonalni porezni ured, Novi Travnik,
- Ovjerena kopija Obavještenja o razvrstavanju pravnog lica prema klasifikaciji djelatnosti, broj: 07-32.5-25269/16 od 14.10.2016. godine, služba za statistiku za područje SBK Travnik,
- Ovjerena kopija Uvjerenja o upisu u Jedinstveni registar obveznika indirektnih poreza broj: 04/1-17-1UPJR/1-3405-2/12 od 22.06.2012. godine, Uprava za indirektno oporezivanje BiH,
- Kopija rješenja o urbanističkoj saglasnosti broj: UPI/03-19-2-72/20 od 05.02.2021. godine za radove na izgradnji složene građevine – regionalnog vodovoda „Plava Voda“, za vodosnabdijevanje općina Travnik, Novi Travnik, Vitez, Busovača i Grada Zenica, izdato od strane Federalnog ministarstva prostornog uređenja;
- Kopija rješenja o okolišnoj dozvoli broj: UPI-/5/2-23-11-76/16 SN od 26.08.2016. godine, za zahvat vode na izvoru Plava voda i trasu transportnog cjevovoda, izdato od strane Federalnog ministarstva okoliša i turizma;
- Dokazi o uplati administrativne takse u iznosu od 60,00 KM i markice Federalne upravne takse u iznosu od 3,00 KM.

B. Projektna dokumentacija – Glavni projekat regionalnog vodovoda „Plava voda“:

- Knjiga 1 - Opći dio
- Knjiga 2A - Glavni transportni vod
- Knjiga 2A - Prilozi (Glavni transportni vod)
- Knjiga 2B - Cjevovodi odvojaka
- Knjiga 2B - Prilozi (Cjevovodi odvojaka)
- Knjiga 3 - Vodozahvat i hlorna stanica
- Knjiga 3A - Prilozi (Vodozahvat)
- Knjiga 3B - Prilozi (Hlorna stanica)
- Knjiga 4 - Crpne stanice
- Knjiga 4 - Prilozi (Crpne stanice)
- Knjiga 5 - Hidrologija

U provedenom postupku koji je prethodio donošenju ovog rješenja, izvršen je uvid u dostavljenu dokumentaciju, pri čemu je utvrđeno slijedeće:

- Glavni projekat "Regionalni sistem vodosnabdijevanja Plava voda", izrađen od strane Instituta za hidrotehniku Građevinskog fakulteta u Sarajevu, oktobar 2011. godine. Dokumentacija je urađena od strane pravnog lica koje ima ovlaštenje za izradu dokumentacije na osnovu koje se izdaju vodni akti, izdato od strane Federalnog ministarstva za poljoprivredu, vodoprivredu i šumarstvo Sarajevo.
- Područje koje pokriva regionalni sistem vodosnabdijevanja „Plava voda“, nalazi se u Srednjobosanskom i Zeničkodobojskom kantonu, uključujući dijelove pet općina: Travnik, Novi Travnik, Vitez, Busovača i Zenica.
- Trasa transportnog cjevovoda počinje na izvoru „Plava voda“ u gradu Travniku, a zatim prolazi kroz dijelove općina Travnik, Vitez, Busovača i Zenica. Trasa cjevovoda presijeca manje potoke, te rijeku Lašvu, Bilu i Kozicu (općine Vitez i Busovača) te rijeku Bosnu u općini Zenica. Ukupna dužina glavnog transportnog voda, od izvorišta Plava voda, do rezervoara Putovići, u općini Zenica je oko 33 km, prečnika 700 mm, 600 mm nazivnog pritiska NP 10, NP 16 i NP 20.
- Količina i raspodjela zahvaćene vode iz izvorišta Plava voda, za potrebe regionalnog vodovodnog sistema Plava voda, bile su definisane Idejnim projektom i iste su, od strane zainteresiranih općina, u ovom Glavnom projektu izmjenjene i iznose:
 - za općinu Travnik: 80 l/s (naselja Dolac na Lašvi 40 l/s i Nova Bila 40 l/s),
 - za općinu Novi Travnik: 40 l/s,
 - za općinu Vitez: 40 l/s,
 - za općinu Busovača: 40 l/s,
 - za općinu Zenica: 350 l/s.

Na osnovu navedenog, ukupna količina zahvaćene vode iz izvorišta Plava voda, za potrebe regionalnog vodovodnog sistema Plava voda, iznosi 550 l/s.

Vodozahvatna građevina projektovana je na način da u periodu malih voda ispušta biološki minimum od 200 l/s.

Zahvatanjem predviđenih količina vode na izvorištu Plava voda i izgradnjom regionalnog vodovodnog sistema Plava voda, neminovno će doći do promjene režima voda (smanjenjem ukupnog proticaja nizvodno od vodozahvata) što može imati određene negativne uticaje na ekosistem, stanovništvo, korito vodotoka, okoliš, druge objekte, stečena prava korisnika voda i dr. te se zaštitnim mjerama, definisanim u okolinskoj dozvoli i projektnoj dokumentaciji predviđa smanjenje negativnih uticaja (Detekcija gubitaka vode u postojećim vodovodnim sistemima svih pet općina; prilagođavanje količine zahvaćene vode hidrološkoj situaciji radi zadovoljenja ekološki prihvatljivog protoka; naknada udruženjima ribolovaca za gubitak ribljeg fonda - poribljavanje rijeke Lašve; regulacija vodotoka Plava voda nizvodno od vodozahvata u cilju vizuelnih efekata izdašnosti; uvođenje novih količina vode u vodotok Plava voda u cilju obezbjeđenja biološkog minimuma, polaganje cjevovoda izvan vodozaštitnih zona izvorišta Kremenik (Vitez) i dr.)

Na temelju utvrđenog činjeničnog stanja i dostavljene dokumentacije, a u cilju smanjenja negativnih uticaja predmetne izgradnje na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 4. dispozitiva rješenja, shodno odredbama članova 114. i 128. Zakona o vodama („Službene novine Federacije BiH“, broj 70/06) i člana 7. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19 i 41/20), propisani uslovi koje je investitor dužan ispuniti u toku gradnje i eksploatacije Regionalnog sistema vodosnabdijevanja Plava voda.

Uzimajući u obzir naprijed navedeno, a shodno odredbama člana 114. Zakona o vodama („Službene novine Federacije BiH“, broj 70/06) i člana 7. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 34/15, 55/19 i 41/20) riješeno je kao u dispozitivu ovog rješenja.

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih.

Voditelj postupka:

Nihad Pezo, dipl.inž.građ.



**Po ovlaštenju
Rukovodilac sektora za izdavanje
vodnih akata**

Haris Ališehović, dipl.inž.građ.

Dostaviti:

- JP Regionalni vodovod Plava Voda d.o.o. Travnik, Zenjak bb, 72270 Travnik
(Prilog – tehnička dokumentacija navedena pod tačkom B. obrazloženja rješenja)
- ⊖ AVP Sava, ISV - vodna knjiga - ovdje
- Arhiva - ovdje
- Oglasna ploča AVP Sava